



Selasa, 8 Agustus 2023
Ogen : Amos 5:10-15



Darami Si Mehuli



Mawar e sekalak ibu rumah tangga si aktif bas media social. Bas ia akun kai pe lit, Instagram, facebook, tiktok, rsd, akun telegramna pe lit e khusus nonton drama korea. Jenis tontonen favoritna eme kerna perselingkuhen. Padahal ia sekalak si lit perbulangenna. Sanga ipersingetti temanna ia gelah ula rusur ngoge berita ras ndengkehken sibage, la ia tek. Adi terkuasai dirita labo masalah, nina rusur ngaloi pedah temanna. Kedungenna, la iarap gejek jabuna perban terdat Mawar ndai jumpa ras mantan rondong, si kepeken nggo jadi TUTI alias tukang tipu. Tapi Melati, beda ka. Ia pe aktif bas media social, acara favoritna e me masak-masak, erbahan sabun alami ras megi-megi khotbah pandita. Erkiteken rusur ndedah ras ngidah resep-resep e, terikut ia rusur erbahan pangan-pangan man anak jabu. Bagepe guna njagai kesehaten isi jabu, mulai itadingkenna sabun-sabun si itukur i kede, ibahanna jine sabun alami arah pelajaren i medsos si rusur iidahna. Dingen praktekkenna pedah pengkhotbah si ibegina i youtube. Ulihna anak-anakna reh sehatna, meteh mehuli, janah uang masuk pe tambah.

La terpungkiri iserusur temanta bergaul maka kita pe tertular banci kerna biakna. Bagi bangsa Israel si rusur bergaul ras kalak si la nandai Dibata si keriahenna eme ndarami si jahat, piahna erbahaca lanai tandaina Dibata, kena ukumen arah Tuhan nari. Emaka daramilah si mehuli, sebab si mehuli pasti erbahanca senang ras meriah. Si mehuli pasti ndekah iinget kalak.

